

“Ceiqnoix haj fanh. Daxbaj, mwngz vaiq ra cienz okdaeuj, Dahyen daengq gou soengq cienz bae, mboujnex, yied nguh yied hoj yw bw!” Dahsoengq coi Mehjen.

Mehjen myaeg Dahsoengq baez he, naeuz: “Mwngz baez deq yaep he, gou bae aeu cienz.” Gangj sat, doq byaij haeuj rug bae.

Gvaq yaep he, Mehjen fwngz gaem dab cienzcej he okdaeuj, danqheiq naeuz: “Ndaw ranz mbouj miz cienzyienh, caenh miz geij cien maenz neix ndwi lo.” Doq naeuz doq nu fwngz, simgaek lumj duzmoed gwnz rek ndat, cam: “Baenzlawz guh, baenz-lawz ha?”

“Daxbaj, geij cien maenz baenz-lawz ndaej gaeuq? Mwngz caiq rara, dauqgeix daxlungz bingzeiz oet cienz haeuj gijlawz cuengq ni?” Dahsoengq beij Mehjen lij simgip, laebdaeb bang de ok cawjeiq.

“Deng bw, gou caiq rara.” Mehjen youh ndonj haeuj rug bae. Dauqma ndaw ding, Mehjen doiq Dahsoengq ngauzngauz gyauej, naeuz: “Caen ra mbouj miz lo.”

Song vunz doxcim myoegmyoeg. Sawqmwh, Dahsoengq yat hemq: “Daxbaj, cam vunz ciq yawjyawj!”

“Deng ha!” Mehjen baez bek fwngz, angqvauvau doq dajhai soujgih, lwgda baenqlulu. “Ciq bouxlawz ni?” De gag damzbyoedbyoed, cijraen de lwgfwngz baez dik baez dik, bued doeng le, de doiq soujgih sing



goksadsad naeuz: “Mehfangh, gou dwg Mehjen. Dahlwg gou deng ci saeg sieng lo, seizneix gaenj yungh cienz bae haidau, mwngz vaiq ciq hawj gou haj fanh maenz, vaiqdi bw, dahyox de lij youq ranz deq. Vaiqdi…… Ndae lo, mbouj gangj baenzlai, mwngz soengq cienz daeuj menh lwnh mwngz nyi.” Denva daj sat, Mehjen sup gaem heiq raezraez he, aeu fwngz bekaek bobbob.

Dahsoengq hix naj riuhehe doiq Mehjen naeuz: “Daxbaj, gij hujgeiq mwngz caen ndei, doq cam doq hawj, mbouj yaemhywx saekdi. Caen hawj vunz hozhaenz.”

Mehjen daekeiq fwngfwng naeuz: “Mehfangh dwg boux hujgeiq ceiq ndei gou lo, song dou caen lumj cejnuengx nei.”

Mehjen caeuq Dahsoengq doq

gangjgoj doq deq Mehfangh. Gvaq cibgeij faen cung, miz vunz roq dou, Mehjen doq ndwn hwnjdaeuj, riengj-retret yamq bae hai dou.

Dahsoengq angq dwk caeg riu ndaw dungx, de hix ndwn hwnjdaeuj, ndaw hoz naemj, cienz baez haeuj fwngz couh vaiqdi deuz, mienx ndaej vunz lai bak cab laeuh hangxsae. Hoeng, de baez coh bakdou ngonz bae, dungxmbouq lo, bakdou ndwnsoengz song boux gingjaz. De doq unq-nemnem dauq naengh roengzma.

Ngoenzlaeng, gyoengqdoi mwngz coenz gou gawq cam Mehjen, cam de baenzlawz ndaej rox meh neix dwg bouxyaeuhvunz? Mehjen hix mbouj giemhaw, doq ndaengmoj fwngfwng, baez di baez dit lwnh hawj daihgya nyi.

Laxlawz, Mehjen banhaet daj aen ban vunzlaux fuengz yaeuh hagsib

ngamq ma daengz ranz, couh cieq daengz dahlwg daj denva daeuj. Dahlwg cam bohmehe ndangdae baenzlawz, naeuz seizneix yungj lai, daengz bat nyied cibngux cij ma ranz damq bohmehe. Vah caengz gangj sat, couh dingqnyi sing roq dou. Youq ndaw ranz, baez dingqnyi meh-yaeuhvunz naeuz Dahyen deng ci saeg sieng, Mehjen couh singsag lo. Gaenlaeng de couh can guh yiengh-yiengh saeng de swnh de, can guh simgaek raixcaix dauqcawq ra cienz. Mehjen youh can guh daj soujgih cij cienz, de daj hawj Veiz gingjgvanh, cix daegdaengq heuh “Mehfangh”, Veiz gingjgvanh baez dingq couh rox dwg maz saeh lo.

Duznyaen caiq gvai hix gvai mbouj gvaq canghdwknyaen.

(sat)

Miz Fukfaenh 有福气

□ Hoz Cunghliuj / 何宗柳

Goengsam Buzsam Mbanjdaih miz song boux lwgnyez, daeggo heuhguh Ahgviq, dahnuengx heuhguh Dahbengz. Goengsam Buzsam bineix ngamq rim 60 bi.

Cibgeij bi gonq, Ahgviq dawz 2 fanh maenz ngaenz duh Goengsam bae Doengbaek cawx ranz aeu yah lo. De baez bae couh mbouj raen ngauez, denva hix mbouj dwk baez lawz, saeng hix mbouj geiq dauq mbat lawz. Goengsam baez hwnj haw cungj bae youzdengiz cam miz mbouj miz saengq geiq hawj de.

Dahbengz haq bae Mbanj-liengzdaeuz, gaengq miz dah iq he. Mbanjliengzdaeuz liz Mbanjdaih cij miz cibgeij leix roen, Dahbengz gvanbaz cieng daiq dahlwg dauq ranzmeh yawj dadaiq, lij bang bohmehe cawx haujlai gij gwn gij daenj. Bohmehe de caeuq gyoengq bouxlaux ciengz haenh naeuz: “Seizneix, lij dwg lwgmbwk lai in bouxlaux ha……”

Gouj nyied cogouj, Dahbengz cingj bohmehe bae Mbanjliengzdaeuz gwn laeuj. Bohmehe de daj gwnz haw dap cisamloek bae daengz seiz, couh mbon cienz okdaeuj gyau hawj bouxhaici. Bouxhaici riu naeuz: “Ngoenzneix, fanz dwg gij hek daj haw raeuz dap ci daeuj mbanj dou, cungj mbouj aeu cienz. Dou 2 aen ci cienmonz dap hek baedauq.” Goengsam Buzsam dingq le, sim’angq raixcaix, itcig docih.

11 diemj cung, daengx mbanj gij vunzgeq 60 bi doxhwnj caeuq caencik bouxlaux 200 lai vunz youq gwnz giuzcangz naengh daiz gwn haeux, bouxboux fajnaj miz riunyumj, ndawsim diemzsubsub. Cunhcangj

gingz cenj laeuj hwnjdaeuj eu:

“Cingj caezgya caez daeuj, Ndoet laeuj caemh gwn ngaiz. Ngoenzneix fukfaenh lai, Lwg saimbwk haeujngaueh.”

Caezgya dingq le, cungj riu hwnjdaeuj, bek fwngz gangj ndei. Gyoengqvunz gwn ndaej yaek imq, miz geij boux dadaiq dawz hoengzbau okdaeuj gyau hawj cunhcangj. Cunhcangj riu naeuz: “Sou geij boux neix daeuj mbanj dou gwn laeuj, gouj nyied cogouj dwg mbat daih’it. Gaengq cibgeij bi lo, moix daengz ngoenzneix, mbanj dou bouxcoz youq ranz guh hong caeuq boux lingx gunghswh moix vunz gien bak maenz ngaenz okdaeuj dakdaih bouxlaux ndaw mbanj donq he, lai gien mbouj hanh. Bohmehe lwgbawx rim 60 bi caengz daeuj gvaq hix cingj daeuj, cungj mbouj sou hoengzbau, lij aeu hawj boux aen hoengzbau dem. Gyoengq dahsau, dawz hoengzbau daeuj fat!” Geij boux dahsau dingq le, sikhaek daeuj baen hoengzbau hawj moix boux vunzgeq, riu naeuz: “Hoh mwngz miz fuk lumj daihhaij, souhgyaeu lumj goengqbya!” Bouxlaux cieq gvaq hoengzbau, cungj gangj: “Docih sou, docih sou!”

Gwn haeux gvaq, Dahbengz soengq bohmehe dauq daengz gwnz haw, de bae hangzlaeuj caeuq boux vunz Mbanjdaih gag ngauz laeuj gai cawx 30 gaen laeuj. Dauq ranzmeh le, Goengsam cam naeuz: “Bae ranz de cawx couh ndaej lo, hozbiet daj haw cawx dauq?” Dahbengz geij naeuz: “Boh, mwngz mbouj rox, gij laeuj hwnj haw lai ndei, laeuj cit youq haw mbouj ndei gai hane. Baezlaeng mwngz bae haw cawx.” Goengsam sikhaek dauj



Gyoengq bya heusau humx mbanj geq.

Goh Cungdingz ingj

cenj laeuj he daeuj sawq, naeuz: “Caen dahraix, gij laeuj neix lai get. Lij dwg dahnuengx lai gyaenz boh bw!” Dahbengz naeuz: “Daeggo hix gyaenz, cij dwg seizneix goulau de caengz ra ndaej geijlai ngaenz, daengz haemh-ndae de couh aiq maranz lo!”

Cingq youq seizde, bouxsoengq-saengq haici daeuj daengz ranz Goengsam, de dawz aen loengxcej he gyau hawj Dahbengz, naeuz: “Naeuz go mwngz mbouj in bouxlaux, de geiq lauzmou he dauq lo.” Dahbengz umj loengxcej bae dwk gwnz daiz. Goengsam raen le, hoz gig ndat, hongz naeuz: “Lwg fouzhauq neix, lau dou mbouj miz youz cawj byaek, couh geiq lauzmou dauq? Ndek rog bae!” De gangj sat, yunghrengz daj gwnz daiz vad gij loengxcej can lauzmou roengz dieg. “Baz” sing ndeu, aen loengxcej dek, miz gij saekgim laeuh okgeij. Dahbengz byaij gyawj bae yawj, yenzlaiz dwg gimdiuz.

Ndaw mbanj miz vunz dingq-

naeuz Ahgviq geiq huq dauqdaeuj, cungj daeuj ranz Goengsam yawj dwg maz huq ndei. Daengz ranz dingq-naeuz dwg lauzmou, cungj danq naeuz boux lwg neix dauqdae rox di saeh lo. Byawz rox, gawqyienz geiq gimdiuz dauq, engq haenh lo: “Va! Ahgviq caen gyaenz bouxlaux bw! Youq rog ra ndaej ngaenz cungj mbouj lumz gij hoj bohmehe ciengx de hung son de baenzvunz.” Dahbengz riu naeuz: “Bohmehe, seizneix sou caen miz fukfaenh ha! Daeggo caeuq gou cungj rox hauqswnh sou! Gou cawx gij huq hawj sou baenzlai, cungj mbouj dij gij gimdiuz daeggo geiq baezneix ne!” Goengsam Buzsam seizneix sim gig angq, Goengsam naeuz: “Hauqswnh mbouj cij dwg yawj byawz ok ngaenz lai ngaenz noix, cijaeu miz sim, doiq bouxlaux ndei, cungj dwg hauqswnh.”

Caezgya bang bae gip gij gimdiuz hwnjdaeuj, dauqbae lij haenh Goengsam Buzsam miz song boux saimbwk ndei.